

15 SEP 1997

PERTEMUAN PM DGN PENGURUS DANA DILIHAT SEBAGAI SATU LANGKAH POSITIF

KUALA LUMPUR, 15 Sept (Bernama) -- Pertemuan antara Perdana Menteri Datuk Seri Dr Mahathir Mohamad dengan sekumpulan pengurus dana asing semalam dilihat sebagai satu langkah positif untuk meningkatkan pasaran saham dan pertukaran asing.

"Bagaimanapun, pasaran terpaksa menunggu untuk melihat kesan yang tidak akan muncul dengan segera," kata para peniaga.

Seorang peniaga pertukaran asing sebuah bank tempatan berkata, pasaran kelihatan berkecuali dalam tindak balasnya. Ringgit ditutup pada 2.9670/20 berbanding unit dolar, jatuh daripada 2.9500/75 pada penutupan Jumaat lalu.

Beliau berkata pertukaran asing dan pasaran saham kelihatan menunggu bagi kedua-dua hasil Belanjawan negara 1998 pada 17 Oktober ini dan langkah-langkah khusus untuk menangani defisit akaun semasa. Seorang peniaga menganggarkan defisit tahun ini berjumlah RM14.6 bilion.

Kebimbangan mengenai defisit mungkin akan membawa kepada kejatuhan dalam nilai pertukaran ringgit, sekaligus memberikan prospek pembayaran tinggi hutang luaran, dalam konteks ringgit.

Seorang peniaga berkata pemulihan ringgit akan mengambil masa beberapa bulan tetapi kerana terlalu bergantung kepada situasi akaun semasa terbaru, pemulihan mungkin hanya akan dapat dilihat tahun depan, tambahnya.

Dalam pasaran niaga hadapan Klibor (Kadar Tawaran Antara Bank Kuala Lumpur), pasaran lengang dengan harga tidak berubah daripada paras Jumaat lalu. Kebanyakan pelabur mengambil pendekatan tidak memasuki pasaran berikutan ketidaktentuan dalam pasaran pertukaran wang dan kadar antara bank yang tidak berubah.

Pasaran saham juga terlalu lengang; seorang penganalisis berkata tidak terdapat banyak minat belian tetapi banyak tempahan jualan.

Pengukur aras Indeks Komposit jatuh 8.02 mata kepada 844.06.

Bursa Opsyen dan Niaga Hadapan Kewangan Kuala Lumpur Options (KLOFFE) terkecuali daripada situasi itu. Niaga hadapan Indeks Komposit di KLOFFE menyaksikan kontrak bulan semerta menarik minat belian besar-besaran.

Bulan semerta September naik 7.1 mata kepada 797.1 dengan 1,598 lot diniagakan walaupun kontrak Oktober jatuh 0.8 mata kepada 791.2 dengan 278 lot diniagakan.

Seorang peniaga berkata terdapat beberapa pelindung nilai apabila pasaran tunai jatuh. -- BERNAMA

MSL ZK/sia